



Odlike i plodovi čvrstog vjerovanja (Meka)

Hatib: Bender bin Abdulaziz Belila

2. rebius-sani 1444. po Hidžri / 28. oktobar 2022.

Neka je hvala Allahu, Gospodaru, Čija je veličanstvenost izvanredna i očita, Čija je snaga jasna i uzvišena, Čija je mudrost sveprisutna i sveobuhvatna. Svjedočim da nema boga osim Allaha, jedinoga, Kome niko nije ravan. Pred Njegovom uzvišenošću svi su ponizni.

Svjedočim da je Muhammed Allahov rob i poslanik, čijom su poslanicom blagodat i Božiji upotpunjeni i čijim je dolaskom objava prestala. Neka su Božiji mir i spas na njega, njegovu časnu porodicu, vrle ashabe i sve one koji ga slijede u dobru dok je vijeka i svijeta.

Pozivam vas, a i sebe, da budemo bogobožni, Allahu pokorni. Poštovani vjernici, budimo bogobožni kako bi nam se Allah smilovao. Onome čije srce hrđa izgrize, teško će lijek pronaći, čak će od njega odustati Onaj što bolje zna od njega samog šta mu se u srcu krije. Neka nam briga najveća bude da se za Sudnji dan pripremimo i da na pitanja Silnog Gospodara svjetova odgovor spremimo. Jer, Uzvišeni nam poručuje: "I tako Mi Gospodara tvoga, njih ćemo sve na odgovornost pozvati za ono što su radili!" (El-Hidžr, 92–93).

Poštovani vjernici, među najboljim osobinama koje vjernik može zavrijediti i postići jeste čvrsta vjera kojom se na najviše deredže uspinje. Čvrsta vjera koja će biti čovjeku podsticaj i uspjeha razlog, životno je ostvarenje i pobjeda velika. Jer, čvrstim vjerovanjem razum pronalazi smiraj i dolazi do nepobitnih odgovora. Smirenost srca po pitanju onoga što je Uzvišeni objavio i s čime je došao Poslanik, sallallahu alejhi ve sellem, srž je imana i njegova suština. Na tom putu nadmeću se pravi vjernici, i trude trudbenici, i time su odlikovani oni koji su Allaha istinski spoznali.





Uzvišeni kaže: "I onima koji budu vjerovali u ono što se objavljuje tebi i u ono što je objavljeno prije tebe, i onima koji u onaj svijet budu čvrsto vjerovali. Njima će Gospodar njihov na Pravi put ukazati i oni će ono što žele ostvariti." (El-Bekara, 4–5)

Čvrsto vjerovanje je razlog da neko bude u Džennet uveden. Poslanik, sallallahu alejhi ve sellem, rekao je Ebu Hurejri, radijallahu anhu: "Ponesi (kao dokaz) ovu moju obuću, pa koga izvan ovog zida sretneš da svjedoči da nema boga osim Allaha, čvrsto vjerujući srcem u to – obraduj ga Džennetom." (Muslim)

Ebu Bekr, radijallahu anhu, kazuje: "Jednom je Poslanik, sallallahu alejhi ve sellem, ustao da nam se obrati s minbera, pa zaplaka i reče nam: 'Molite Allaha da vam oprostí grijehe i podari zdravlje. Najbolje što nekom može biti darovano, poslije čvrste vjere, jeste zdravlje (ar. afijet).'" (Tirmizi)

Ibn Mesud, radijallahu anhu, kaže: "Najbolja vjera je čvrsta vjera."

Ebu Bekr el-Verrak kaže: "Čvrsta vjera je život za srce."

Hasan el-Basri kaže: "Čvrstom vjerom priželjkuje se Džennet, a Vatra izbjegava. Čvrstom vjerom strogo obavezni ibadeti postaju ispravni. Čvrsto vjerom ustrajava se na putu istine."

Poštovani vjernici, isključivo čvrstim ubjeđenjem rađa se čvrsta vjera: čvrstim ubjeđenjem u Allaha, džellešanuhu, o neophodnosti postupanja po Njegovim naredbama, o neophodnosti traganja za Njegovim zadovoljstvom, o neophodnosti borbe protiv ličnih prohtjeva, šejtana i strasti.

Čvrstom vjerom ostvaruju se najveći ciljevi i postižu najljepši rezultati, i time se osigurava lijep život na oba svijeta. Ibn Kajjim bilježi: "Vjernik ne može imati dobar život na oba svijeta bez čvrste vjere i zdravlja. Čvrsta vjera biva razlog da izbjegne kaznu na onom svijetu, a zdravlje sprečava da ovozemaljske bolesti nagrizaju njegovo srce i tijelo."

Čvrstim vjerovanjem čovjek može uzeti pouku i poruku iz Allahovih dokaza, hodeći kroz život svjetlom spoznaje.





Uzvišeni kaže: "On upravlja svim i potanko izlaže dokaze da biste se uvjerali da ćete pred Gospodara svoga stati." (Er-Ra'd, 2)

"Na Zemlji su dokazi za one koji čvrsto vjeruju." (Ez-Zarijat, 20)

"Ovo je putokaz ljudima i uputstvo i milost onima koji čvrsto vjeruju." (El-Džasija, 20)

Ko bude zavrijedio da čvrstu vjeru nosi u srcu, uvijek će se oslanjati na Allaha i strpljivost će mu biti vrlina, jer će vjerovati da Uzvišeni sve mudro određuje. Uvijek će biti zadovoljan sudbinom i određenjem. Iskušenja će doživljavati darovima, a nedaće će se u blagodati pretvoriti. Bit će najbogatiji među ljudima, čak i ako ne bude imao mnogo imetka.

Poštovani vjernici! Sušta suprotnost čvrstom vjerovanju (ar. jekin) je vezivanje stvorenja za nešto drugo mimo Gospodara, odnosno da srce žudi za nekim i da samo iščekuje šta mu on može dati. Sehl b. Abdullah kazuje: "Nemoguće je da srce osjeti slast čvrstog vjerovanja kada smiraj pronalazi u nečemu drugom mimo Allahove vjere."

Ko bude pridavao značaj i stalno slušao neistinite tvrdnje i riječi koje unose smutnju i podstrekuju strasti – kobne posljedice će snositi i težak život će živjeti. Najgore riječi su one koje siju smutnju, a najbolje su one koje podstiču čvrsto ubjeđenje u Boga. Uzvišeni kaže: "Ovaj Kur'an je putokaz ljudima i uputstvo i milost onima koji čvrsto vjeruju." (Er-Rum, 60)

Poštoavni vjernici, donesimo salavat i selam na najbolje Allahovo stvorenje, na poslanika Muhammeda. Neka su Božiji mir i spas na njega, na njegovu časnu porodicu, vrle ashabe i sve one koje ih u dobru slijede do Sudnjeg dana. Uzvišeni, smiluj se i nama. Ti si, uistinu, milostiv i darežljiv.

Gospodaru naš, podari nam korisno znanje, obilnu nafaku, te podari da često činimo dobra djela i od nas ih primi. Uzvišeni Allahu, podari nam da svaku stvar dobrim skončamo i zaštititi nas od sramnih grijeha na dunjaluku i kazne na ahiretu.





“Gospodaru naš, mi u ono što Ti objavljuješ vjerujemo i mi poslanika slijedimo, zato nas upiši među vjernike!” (Ali Imran, 53)

“Gospodaru naš, podaj nam dobro i na ovome i na onome svijetu, i sačuvaj nas patnje u Ognju!” (El-Bekara, 201)

“Allah zahtijeva da se svačije pravo poštuje, dobro čini, i da se bližnjima udjeljuje, i razvrat i sve što je odvratno i nasilje zabranjuje; da pouku primite, On vas savjetuje. I ispunjavajte obaveze na koje ste se Allahovim imenom obavezali i ne kršite zakletve kad ste ih tvrdo dali, a Allaha kao jamca sebi uzeli, jer Allah zna ono što radite.” (En-Nahl, 90–91)

